

宋
四
六
話
二



宋 四 六 話

(二)

彭 元 瑞 撰

宋四六話卷五

表

蜀中石刻東坡文字彙其改竄處甚多玩味之可發學者文思今具注二篇於此乞校正陸贄奏議上進劉子學問日新下云而臣等才有限而道無窮於臣字上塗去而字竊以人臣之獻忠改作納忠方多傳於古人改作古賢又塗去賢字復注人字智如子房而學則過改學字作文字但其不幸所事暗君改所事暗君作仕不遇時德宗以苛察爲明改作以苛刻爲能以猜忌爲術而贄勸之以推誠好用兵而贄以消兵爲先好聚財而贄以散財爲急後於逐句首皆添注德宗二字治民馭將之方先寫馭兵二字塗去注作治民改過以應天變改作天道遠小人以除民害改作去小人以陛下聖明若得贄在左右則此八年之久可致三代之隆自若字以下十八字並塗去改云必喜贄議論但使聖賢之相契卽如臣主之同時昔漢文聞頗牧之賢改漢文聞三字作馮唐論取其奏議編寫注呈塗去編字却注稍加校正繕五字臣等無任區區愛君憂國感恩思報之心改云臣等不勝區區之意獲鬼章告裕陵文自孰知耘耔之勞而下云昔漢武命將出師而呼韓來廷効于甘露憲宗厲精講武而河湟恢復見於大中後乃悉塗去不用獷彼西羌改作愷彼西戎號稱右臂改作古稱非愛尺寸之疆改作非貪自不以賊遺子孫而下云施於冲人坐守成算而董氈之臣阿里骨外服王爵中藏禍心與將鬼章首犯南川後乃自與將而上二十

六字並塗去。而西蕃首領鬼章首犯南川。爰敕諸將。改作申命諸將。蓋酬未報之恩。改作爭酬。生擒鬼章。改作生獲。其下一聯。初云。報谷吉之冤。遠同強漢。雪渭水之恥。尙陋有唐。亦皆塗去。乃用此二事。別作一聯云。頡利成擒。初無渭水之恥。郅支授首。聊報谷吉之冤。末句務在服近而柔遠。改作來遠。梁溪漫志。子瞻幼年見歐陽公謝對衣金帶表而誦之。老蘇曰。汝可擬作一聯。曰。匪伊垂之。而帶有餘。非敢後也。而馬不進。至爲穎州。因有此賜。用爲表謝云。枯羸之質。匪伊垂之。而帶有餘。斂退之心。非敢後也。而馬不進。後爲兵部尙書。又作謝對衣帶表。略曰。物生有待。天地無窮。草木何知。冒慶雲之渥采。魚鰕至陋。借滄海之榮光。雖若可觀。終非其有。四六至此。涵造化之妙旨矣。四六話。

東坡守杭守穎。皆有西湖。故穎川謝表云。入參兩禁。每玷北扉之榮。出典二州。輒爲西湖之長。鶴林玉露。退之南山詩云。或齊若友朋。或差若先後。人多不知先後之義。練塘洪慶善吏部與祖引前漢志云。見神於先後宛若。其注云。兄弟妻。關中呼爲先後。予觀東坡徐州謝上表云。信道直前。曾無坎井之避。立朝寡助。誰爲先後之容。或疑先後不可對坎井。蓋不知亦出於此也。梁溪漫志。

先生嘗愛東坡過海謝表云。臣無毫髮之能。而有邱山之罪。宜三黜而未已。跨萬里而獨來。蓋蕭然出四六畦畛之外。後耳目志。

東坡益州謝表云。天地能覆載之。而不能容之於度外。父母能生育之。而不能出之於死中。至今膾炙人口。蓋用後漢袁敞傳張俊語曰。天地父母能生臣俊。不能使臣俊當死復生。朱翌猗覺寮雜記。

鄧安惠自翰苑出守成都。謝表云。捫參歷井。方知蜀道之難。就日望雲。已覺長安之遠。用李泰伯語。又嘗有啓云。三山已到。輒爲風引而還。九關神遊。不覺夢驚而失。前輩文采。風流蘊藉如此。能改齋漫錄。外大父晁舍人謝落職表云。投鼠忌器。輒冒天子之從臣。剪爪及膚。不識朝廷之大體。指耿黃門而言。四六談塵。

閻令洵仁善四六。而一字不肯妄下。必求警策以過人。謝再除陝西轉運使表曰。識道重來。端同老馬。操刀却視。若宰全牛。謝復官表曰。悲未見於齊羊。笑中分於鄭鹿。臨死作發運使表曰。轉輸九路。回泝萬艘。過冒職名。出持使旨。夢遊帝所。驚睥面之回春。來自日邊。覺榮光之照水。漸浮楚澤。回望堯雲。伏念臣少也羈孤。長而疵賤。學宗論語孟子。粗識指歸。仕遇神考。泰陵俱蒙獎擢。而臣志未伸於每刲。思不報而逾深。脾消乘傳之餘。心折號弓之後。侵尋晚景。辜負明時。頃畢通喪。適逢初政。饒軍西塞。賜對中宸。曲荷聖知。竟除宰屬。忽從怨府。升寅儒林。未免螢窗之廬。但愧桑榆之晚。三光倒影。自一壺中。萬里提封。幾半天下。然而承平既久。積弊日深。公私困於盜攘。官政習於涵養。儉安則如抱薪救火。欲速則如以莖療饑。必待更張。庶能漸正。然恐約束未周於郡縣。謗傷已達于闕朝。明月夜光。寧無按劍。高山流水。自有知音。仰侍聖明。俯殫勤拙。矢心論報。沒齒爲期。四六話。

孫賁公素除河東轉運使。託先子代作謝表。蓋河東堯故郡之地。曰富歲三登。有唐叔得禾之異。輿情百樂。興堯民擊壤之歌。末云。過太行回顧雲下。義感親聞。望長安遠在日邊。心馳帝闕。公素讀之笑曰。公乃

末篇寓忠孝之意也。四六話

張天覺丞相再召到闕。謝表云：十年去國，門前之雀可羅。一日還朝，屋上之鳥亦好。後有達官表亦云：十年去國，不聞長樂之鐘。一日還朝，復見大君之鼎。見魏漢津所鑄九鼎初成也。錢惲錢氏私誌

九章算術：五雀六燕，飛集於衡，衡適平。一雀一燕，飛而易處，則雀重而燕輕。陸農師謝吏部尚書表：六燕相停，試銓平其輕重，蓋用此。困學紀聞

元暉爲左司諫，論事忤蔡氏，謫昭潭。後復管勾江州太平觀。謝表曰：言之未盡，悔也。奚追？老學庵筆記

豐相之於舒信道，鄒至完於呂望之，其爲人似不類，然相與皆厚甚，不以鄉里及同僚故也。相之爲中司時，猶力薦信道。至完元符中進用，則實由望之薦也。及其直諫遠竄，望之坐薦非其人，褫官。謝表云：臣之與浩，實匪素交，以其嘗備學校之選於先期，能陳詩賦之非於元祐，比緣薦士，遂取充員，豈期螻蟻之微，自速雷霆之譴。其敍陳終不以至完爲非，亦不易矣。老學庵筆記

蘇在廷元老，東坡先生之從孫，自幼卽卓然。東坡許之，元符末入太學。東坡已渡海，每與其書，委曲詳盡。宣和中，歷館職，郎曹奉常。言者論其宗元祐學術，罷爲宮觀。而謝表乃云：念昔黨人偶同高祖，士大夫頗少之。揮塵餘話

楊子安侍郎坐黨籍謫官洛陽。其謝再任宮祠表云：地載海涵，莫測包荒之度。春生秋殺，皆成造化之功。邸報至丹陽，蔡元度在郡，見報驚歎，諷詠之。四六話

今時士大夫論四六多喜其用事精當下字工巧以爲膾炙人口此固四六所尙前輩表章固不廢此然其剛正之氣形見於筆墨間讀之使人聳然人主爲之改容姦邪爲之破膽元符末劉元城自貶所起帥鄆當過闕公謝表云志惟許國如萬折之而必東忠以事君雖三已之而無愠坐是遂不得入見大觀間陳了翁在通州編修政典局取尊堯集了翁以表繳進其語有云愚公老矣益堅平險之心精衛眇然未捨填波之願後竟再坐貶此二表於用事下字亦皆精切而氣節凜凜如嚴霜烈日與退之所謂登泰山之封鏤白玉之牒者似不侔矣

梁溪漫志

翟三丈公巽宣和末蔡條約之用事外召從官七人公巽再以瑣闥召力辭之未至闕有旨落職宮祠繼而復還待制公作謝表有云彈貫禹之冠誠非本志奪伯氏之邑其又何言又云惟一與一奪之命無有三三而三仕三已之心敢懷愠喜人多稱之

張邦基墨莊漫錄

翟公巽謝對衣金帶鞍馬表云顧臣非緇衣之宜敝予又改以臣從大夫之後不可徒行葉少蘊謝頒朔表曰豈特千歲之日可坐而致將使百畝之田勿奪其時汪彥章賀進築隆兌二州及城寨表云我陵我阿不以山谿之險有民有社在吾邦域之中皆用經史全語而工者

墨莊漫錄

翟公巽雖爲蔡京所汲引然抗直不爲屈初代宰相作賀日有戴承表末云衆非后何戴率傾就望之心無不爾或承永懷畏愛之德京讀終篇曰奇文也然無不爾或承對衆非后何戴似乎偏枯欲以臣不命其承易之亦不失承字而稍加親切如何公巽曰勝矣然業已供本竟不易京亦不能奪也未幾又代作

天神示現表有云。聖神受命穆清。告成禹錫。祖宗在帝左右。願予湯孫。末云。在天對越。乏清廟肅雍之儀。前席具言。愧宜室鬼神之間。京曰。國有盛事如此。公巽之文。真爲時而出也。公巽徐曰。疇昔不命其承。抑云過矣。今日爲時而出。厥有旨哉。京雖惡其不遜。然尙能容之。石林嘗喜道之。寓簡

翟公巽參政。汝文守越。以擅免民間。和買縑帛四十餘萬。爲部使者所劾貶秩。公謝表云。欲安劉氏。無嫌晁氏之危。豈若秦人坐視越人之瘠。迨去郡。郡人安其政。將相率投牒借留。公知之。命取其牘。以朱書其上云。固知京兆始爲五日之留。無使稽山復用一錢之送。其用事精當如此。梁溪漫志

道家者流。謂蟾蜍萬歲。背生芝草。出爲世之嘉祥。政和初。黃冠用事。符瑞翔集。李譔以待制守河南。有民以爲獻者。譔卽以上進。祐陵大喜。布告天下。百官稱賀於廷。上表云。九天容澤。溥及含靈。萬歲蟾蜍。聿生神草。本實二物。名各一芝。或善辟兵。或能延壽。乃合爲於一體。允特異於百祥。命以金盆儲水。養之殿中。浸漬數日。漆絮敗潰。質迹盡露。上怒。黜譔爲單州團練副使。謝表云。芹獻以爲美。野人之愛則深。與乘而可欺。子產之智焉在。譔至之孫也。揮塵後錄

宣和初。童貫平方寇既歸。與王黼生隙。黼大懼。遂媚貫。奮當北伐事。四年夏。不謀於衆。兵遽起。魯公時已退休。亟請對。具爲上言。乞止。不可。未幾。伯氏亦有宣撫命。於是魯公垂涕頓首上前曰。臣不任北伐。事自甘閒退。今臣子行。誠無以曉天下。願陛下保全老臣。上不聽。則曰。臣請效括母。及語伯氏曰。吾將哭師也。及後燕山告功。魯公以表賀上。其末云。臣慮終而不慮始。知守而不知通。有覲初心。徒欣盛烈。上覽表時。

喜見顏色曰。太師能自直守如此。因以穀核酒醴頒賚甚寵。俾公慶伯氏之歸也。蔡條鐵圖山叢談

初。置觀文殿大學士。詔自今非嘗歷宰相不除。著爲令。宣和七年。先公自北門召。忽有此授。方引故事退避。明年復召爲中書侍郎。遂拜相。前告猶寄左藏庫。淵聖遣中使取以賜先公。復力辭。上終不許。先公不得已受之。謝表略曰。知章兩命之兼榮。足爲盛事。張說大稱之獲免。有愧前修。蓋謂是也。却掃編

故事。宰輔領州。至中使以事經由。必傳宣撫問。宣和間。先公守南都。地當東南水陸之衝。使傳絡繹不絕。一歲中撫問者至十數。故嘗有謝表云。天闕夢回。必有感恩之淚。日邊人至。嘗聞念舊之言。却掃編

秘書新省成。徽廟臨幸。孫叔詣作賀表云。蓬萊道山。一新羣玉之構。勾陳羽衛。共仰六飛之臨。同時無能及者。老學庵筆記

趙延康在宣和靖康間。聲望風采。震耀一時。及守宛邱。百戰禦敵。卒全其城。來朝行在高皇。欲以左轄命之。議者謂宗室輔政。非故事。遂止。方公之南徙也。謝表有云。臣本支百世。侍從三朝。又云。堅壁以保近畿。慨前功之俱廢。登壇而陪盛禮。懷曩遇以自憐。讀者悲之。放翁題跋

宣和間。尙書新省成。車駕臨幸。時宰命一時朝士能文者。各擬謝表。獨林子中者擅場。其一聯云。北辰居極外。環象斗之宮。黃道初經。旁及積星之位。浩然齋雅談

宣和中。先公在北門。有王褒者。宦官也。來爲廉訪使。在流輩中。每以公廉自喜。且言素仰先公之名德。極相親事。會入奏回。傳宣撫問畢。因言比具以公治行奏聞。上意甚悅。行召還矣。先公退語諸子。意甚恥之。

故謝表有曰。老若李鄴。久自安於外鎮。才非蕭傳。敢雅意於本朝。長兄惇義之文。蓋具著先公之意也。却掃編。

歐陽瓌謝賜御製宣德樓上梁文表曰。端門層觀。虹梁鬱起於中天。奎畫寶章。芝檢驟來於清禁。首聯雖見賜宰臣之意。而奎畫寶章芝檢。不無稠疊。矧是御製。不應用奎畫芝檢。此所以爲第三人也。又曰。相周王之考室。初無補於涓埃。仰虞帝之作歌。乃獲窺於黼黻。此聯却工。辭學指南

鄭威愍公驤新除。謝上章云。關陝六七任。不挂權臣之橫恩。崇觀二十秋。靡沾故相之餘潤。公之一節如此。馮翊之死義。其處之有素矣。困學紀聞

馬涓巨濟。宣和間。謝復承事郎表云。岵巵丹闕。如曾清夢之遊。藍縷綠衣。猶是廣庭之賜。四六談麈童貫。蔡攸收復燕山奏至。宰相王黼率百官稱賀。表中多得意語云。陛峻明堂。旣揭平朔之號。軒藏石鼓。仍題復古之名。承九清之命。而整神霄陰相之旅。建三辰之旗。而向太一下臨之方。秀水閒居錄

宣和五年五月二十九日。童貫。蔡攸大奏凱以入。告功於朝。六月一日。蔡京上賀表曰。師由義動。往城于方國。以和成。不戰而屈。舉全燕之故地。弔大漠之遺民。戴白垂髻。歡呼而解紆。壺漿簞食。充塞而載塗。萬國來同。一夜底定。乾坤動色。廟社用光。中賀。惟北有邦。實冀之府。大禹所別。有虞嘗巡。粵我造邦之初。遂爲與國之敵。始約兄弟。尊至祖孫。金縢締交。使傳洽至。其強勿率。偕位號者二百年。有志未遑。更聖君之六七作。惟昔神考。于時元豐。分將隸兵。聯民講武。閱九軍之師陣。建北面之黃旗。無覺可乘。有訓斯在。皇

帝陛下。以重華而紹帝之事。以下武而繼文之聲。因其天亡之時。成是席卷之勢。臣願爲稚長。久誤眷知。詩。嘯之庭。屢趨而過。軍旅之事。蓋未嘗聞。察之於談笑杯酌之間。付之以疆場甲兵之事。乘其萬舉萬全之會。授之百發百中之機。是惟秉鉞以專征。豈可因人而成事。山川草木。悉歸輿地之圖。士女臣民。盡効職方之貢。此蓋皇帝陛下懋昭大德。通駿先猷。人斯效能。天實助順。揚勵無前之偉績。鋪張不世之宏休。千載君臣。適遇風雲之際。一門父子。得爲勳戚之家。三朝北盟會編

宣和乙巳。上皇內禪。吳敏元中建議。及謝門下侍郎表云。上皇勸勤。授皇圖於元子。微臣攝直。適視草於禁中。初無一言以贊大議。君子與其不伐。野客叢書

靖康元年。徽宗巡幸淮泗。將還京闕。禮部郎中劉觀代宰臣賀表云。漢室太公。本是蓬蒿之叟。唐朝肅帝。殊非揖遜之人。何丞相文縝以其語太樸。因改云。擁簪迎門。陋未央之末禮。御鞍馳道。笑至德之末情。能改齋漫錄

文縝以四六知名。其謝召還表云。兩曾參之是非。浮言猶在一王尊之賢佞。更世乃明。四六談塵
何文縝以曲學罷正字。其謝章云。師友淵源。妄追探於千載。文章戶牖。期自立於一家。獨簡聖知。何名曲學。四六談塵

靖康中。蔡元長父子既敗。言者攻之。發其姦惡。不遺餘力。蓋其門下士如楊中立、孫仲益之類。是也。李森發光時爲侍御史。獨不露章。且勸勿爲太甚。坐是責監汀州酒稅。謝表云。當垂涕止關弓之射。人以爲狂。

然臨危多下石之徒。臣則不敢。士大夫多稱之。揮塵餘話。

門下侍郎許將下御史獄。抗章云。絲豪自知其無咎。父子相繫而爲囚。迫屬吏十有六人。繫病者百有三日。終無可坐之罪。遂加不實之刑。宋史朱諤傳。

范元長內翰靖康中。謝淮東茶鹽表云。瞻茲摘山之利。蓋出當時之權。明詔惟行。盡復祖宗之舊。微生何幸。願還畎畝之中。四六談塵。

幹闥不犯燕山。郭藥師令儒林郎王樞草降表云。待時而動。動靜固未知其常。順天者存。存亡不可以不察。又云。臣素提一旅之師。偶遭百六之運。又云。宋主戴嘉。秦官是與。念一飯之恩。必報。則六尺之軀。可捐。雖知上帝之是臨。敢思困獸之猶鬪。又云。昔也東征。雖雷霆之怒。敢犯。今而北面。祈天地之量。并容。辭多不記。許探陷燕記。

靖康丙午。何文縝栗相。敵騎初退。時議欲率文武百僚拜乞聖節上壽。文縝命吏部郎中方允迪。元若爲三表。才上卽允所請。後二表不復用。文縝與允迪大稱歎賞不已。且云。恨不果用。然當誦佳句於百僚之上也。今列於後。第二表云。立爲天子。肇興黃帝之英姿。請祝聖人。允執唐堯之謙柄。載陳惻愍。冀動淵衷。中謝。恭惟皇帝陛下。勇智生知。聰明性稟。東宮主器。盛德久孚於寰瀛。內禪應圖。大計果安於社稷。厲精爲治。側身修行。儉奉己而厚事親。寬御衆而亟承祖。維震夙之令旦。萃晉師之歡呼。五百歲爲春秋。寧俯稽於南楚。一千年而華實。盍還取於西池。何睿意之勿休。當綈儀而固拒。伏望昭一人之有慶。納萬壽之

無疆。陋彼太宗。南嚮辭而必再。超乎孝武。中岳呼而止三。幸賜俞音。或從公願。第三表云。節紀千秋。歸美薦形於剡牘。享加三夏。隆謙再却。乎舉觴。効罄輿情。頻于宸聽。皇帝陛下。兆於變化。生而神靈。舉建己誕彌之辰。應虹流長發之瑞。盡仁皇之忠厚。指乾元於向辰。有神祖之聰明。數同天於過信。正心誠意。勤邦儉家。地闢天開。而除妖災。雷厲風行。而成功治。龍樓問寢。欣西宮鳴蹕之還。虎符發兵。至北鄙控弦之遠。式全不構。允謂中興。豈有首臨蘭殿之期。而當力拒華封之祝。伏望皇帝陛下。制行不以己。斂福用錫民。登五咸三。偉示慈之高宴。桑田東海。協稱壽之權謠。罔達就日之懷。克受後天之算。王明清玉照新志。上宿郊宮。與粘罕。幹離不尙未相見。遣使議事。索降表。上命孫覲草表。但言請和稱藩而已。使人齎草示粘罕。粘罕以爲未是。使人往來者數四。皆不中。而要四六對屬作降表。覲與吳玠互相推避。不下筆。上曰。事已至此。當卑辭盡禮。勿計空言。促使爲之。於是覲。玠與何處共草成之。其略云。三匝之城。遽失藩籬之守。七世之廟。幾爲灰燼之餘。旣煩汗馬之勞。敢緩牽羊之請。又云。上皇負罪以播遷。微臣捐軀而聽命。又云。社稷不隕。宇宙再安。上覽訖。謂孫覲曰。對屬甚切。非卿平昔閑習。安能及此。宣和錄。

靖康要盟錄載表曰。背恩致討。遠煩汗馬之勞。請命求哀。敢廢牽羊之禮。仰祈獨貸。俯切凌兢。孫覲辭免待制狀曰。靖康國破。淵聖表降。亟欲援吾君。擠陷於不測之危。豈復計此身。誅絕於中興之後。有喧公議。請寘嚴科。凡此誤朝。誰爲禍首。俾二聖辱在泥塗。而不問。則一時失於翰墨。以何尤。三朝北盟會編。張邦昌僭逆。集百官作推戴表。少監王紹草之。先敍大金皇帝云。道合三光。功高九有。惇德允元。智將幾

於虞帝弔民伐罪。義實過於周王。又敍邦昌云。惟太宰相公。識探天人。學貫今古。內外之聲久著。天人之意允洽。膺大國褒崇之禮。希前王作聖之功。可治國事。以主斯民。三朝北盟會編

靖康末。金人立張邦昌。顏博文作赦書。無非吠堯之辭。聞者駭愕。及以大寶歸上表云。孔子從佛肸之召。意在尊周。紀信乘漢王之車。誓將誑楚。野客叢書

李淑到河中府。謝上表曰。長安日遠。戴盆之望徒深。宣室夜闌。前席之期不再。王陶再來河南府。謝上表曰。田園僅足。二疏那見其復來。羽翼已成。四皓寧聞於再起。二公表意一同。到任未幾皆卒。黃朝英絃素雜記

宗忠簡公澤累表請上還京。略曰。今敵兵尙熾。羣盜繼興。比聞遠近之驚傳。已有東南之巡幸。此誠王室安危之所係。天下治亂之所關。恐增四海之疑心。謂置兩河於度外。因成解體。未諭聖懷。不報。宋名臣言行錄

宗忠簡公集八卷。歿無一語及家事。但連呼過河者三。遣表猶贊上還京。先言已涓日渡河而得疾。其末曰。囑臣之子。記臣之言。力請鑾輿。亟還京闕。大震雷霆之怒。出民水火之中。夙荷君恩。敢忘尸諫。死之日。都人爲號慟。朝野皆相弔出涕。宋名臣言行錄

張浚等義師起。李文肅公邴與權直院張守分撰請復辟表及批答。上御朝明日。賜公親札。略曰。卿毅然正詞。氣折凶醜。萬衆動色。具臣覲顏。公謝表亦云。謀寢淮南。雖慙素望。笏擊朱泚。實厲壯心。詰責兇渠。激

楊禁衛。迨成復辟。實與祕謨。蓋出孤忠。豈微後福。當時稱爲實錄。宋名臣言行錄

李成受招安。令泗州進士許道作謝表。有云。恨非李廣之無雙。願効顏回之不貳。有旨。爲文人婉順。先發赴行在。三朝北盟會編

四六有作流麗語者。須典而不浮。汪彥章賀神降萬歲山表云。恍若壺天。金成宮闕。浩如玉海。虹貫山川。辭學指南

汪彥章四六之工。自少年卽妙。崇寧三年霍端友榜。瓊林花宴謝頒冰。彥章作謝表有云。使嗽潤而吮清。得除煩而滌穢。順時致養。俯同幽雅之春開。受命知榮。固異衛人之夕飲。又云。深防履薄之危。不昧至堅之漸。子孫傳誦。記御林金盃之香。生死不忘。動宮井玉壺之潔。墨莊漫錄

顏魯公自撫州刺史移湖州刺史。汪彥章藻紹興初。自湖州移撫州。謝上表云。惟臨汝之故都。有魯公之遺跡。時常唐代。來自吳興。雖賢愚比擬之非倫。然明聖選除之得所。奉明主十行之詔。願布寬隆。想英賢百世之風。更思奇節。語意條暢。亦奇矣。第來自吳興。小疵也。能改齋漫錄

劉禹錫聽舊宮人穆氏唱歌一詩云。曾陪織女渡天河。記得雲間第一歌。休唱正元供奉曲。當時朝士已無多。劉在正元任郎官御史。後二紀方再入朝。故有是語。汪藻始采用之。其宣州謝上表云。新建武之官儀。不圖重見。數正元之朝士。今已無多。汪在宣和間。爲館職符寶郎。是時紹興十三四年中。其用事可謂精切。邁嘗四用之。謝侍講修史表云。下建武之詔書。正爾恢張於治具。數正元之朝士。獨憐留落之孤蹤。

以德壽慶典。曾任兩省官者遷秩。蒙轉通奉大夫。謝表云。供奉當時。敢齒正元之朝士。頌歌大業。願廣至德之中興。充永思陵橋道頓遞使。轉宣奉大夫。謝表云。武德文階。愧三品維新之澤。正元朝士。動一時既往之悲。主上卽位。明堂禮成。謝加恩云。考皇祐明堂之故。操以舉行。念正元朝士之存。今其餘幾。亦各隨事引用。近者單麟以知紹興府進文華閣直學士。謝表云。數甘泉法從之舊。真正元朝士之餘。襲當淳熙中。雖爲侍郎。一朝名臣尙多。又距今才十餘歲。似爲未穩貼也。容齋四筆。

汪彥章賀呂成公初大拜啓云。方羣臣憂杞國之天。靡遑朝夕。乃兩手取虞淵之日。重正乾坤。四六談塵。程子山紹興初爲史官。以狂躁得罪。歸蜀遷靖州。表謝曰。爲其自作弗靖。故使謫居此邦。人以爲能自狀也。寓簡。

紹興二年三月。資政殿大學士王綯表。臣昨任提舉萬壽觀。兼侍讀。正月二十四日。奏事殿中。乞以臣父故宣德郎贈太子太保先臣發元祐中。應賢良方正能直言極諫科目。所進策論十卷。凡五十篇。俟裝褱畢。日依臣見進故事例。詣通進司報進。面奉聖旨依奏。綯旋得請提舉洞霄宮。繳進其父所爲五十篇之文。表略曰。惟元祐之紀元。復制科而取士。維時司馬光之客。有若劉安世之賢。見所爲書。舉以應詔。因知己之遷謫。并薦士而棄捐。事與志違。言隨名寢。蓋是安世旣貶。發故不得召。東坡嘗得其詞藁。致書謂慮深詞達。非淺陋所及。四朝聞見錄。

紹興九年十月二十一日。詔皇太后宮殿名慈寧。三十日畢功。羣臣上表云。臣等言德之大者。必盡萬物。

之報。以稱其禮。孝之至者。必得四表之心。以寧其親。天祚文武之隆。世基姪姒之德。仰模太紫。前考異宮。宜詔揭於鴻名。以答揚於流澤。臣中賀。竊以東朝置衛。遠存長樂之鴻名。中禁承顏。近著寶慈之茂實。皆以體王居於宸極。據寶勢於坤靈。廣一人欽愛之風。極萬世尊崇之奉。載新令典。允屬聖時。伏望皇帝達孝。通於神明。要道形於海宇。紹復大業。對越祖宗。在天之靈。抑畏小心。躬達帝王高世之行。人與能而樂戴。天復命以中興。上推履武之祥。不啓生商之慶。方且致天下之養。用寅奉於母儀。成路寢之威。示日嚴於子道。臣等率籲衆志。懇款一詞。敢稽令於前章。極崇施於顯號。叶情文而並舉。煥典冊以增華。輦道中通。朝夕燕雨宮之喜。珮環入覲。時節奉萬年之觴。示垂裕於無疆。益儲休於有羨。伏請建皇太后宮殿。以慈寧爲名。時顯仁太后尙羈北庭。讀此真堪爲高廟泣下也。楓窗小牘

竇叔向所用柰花事。出晉史。云成帝時三吳女子相與簪白花。望之如白柰。傳言天公織女死。爲之著服。已而杜皇后崩。其言遂驗。紹興寧德皇后訃音從北庭來。知徽州唐煇使休寧尉陳之茂撰疏文。有語曰。十年罹難。終弗返於蒼梧。萬國銜冤。徒盡簪於白柰。是時正從徽廟蒙塵。其對偶精確如此。容齋四筆。秦會之忠獻公謝車駕幸第。家人輩各拜恩數表。首云。注目帝車。方望雲而盤辟。移居仙境。容舐鼎以飛昇。中謝後云。婦子孫息。同荷優恩。官封服章。躋登常職。末云。臣敢治外自內。訓子及孫。共肩忠孝之心。永享國家之福。祐陵復土。被命撰哀冊文。首云。十年生別。萬里喪歸。清波別志。

紹興己未。周敦義葵爲侍御史。梁仲謨汝嘉爲戶部尙書。敦義欲論之。甫屬藁。而泄其事於仲謨。時秦會